



20. Oktober 2020

UKA 2020/194

**Center for Cybersikkerhed (internetikkut isumannaassuseq) pillugu inatsisip Kungip peqqussutaatigut Kalaallit Nunaannut atuutsinneqalernissaanut Inatsisartut aalajangiussassaatus siunnersuutaa Kalaallit Nunaanni Namminersorlutik Oqartussanit akuerineqassasoq.**

(Ilinniartitaanermut, Kultureqarnermut Ilageeqarnermullu Naalakkersuisoq)

**Siullermeenera**

Center for Cybersikkerhed (internetikkut isumannaassuseq) pillugu inatsisip Kungip peqqussutaatigut Kalaallit Nunaannut atuutsinneqalernissaanut Inatsisartut aalajangiussassaatus siunnersuutaa matumuuna saqqummiunneqartoq Partii Naleqqamiit ilassilluarlugu tikilluaqqarput.

Kalaallit Nunatta nammineerluni nunarsuarmioqataasut ersarissigaluttuinnarnera tamatta arajutsisimangilarput, aammalu toqqaannartumik nunap innutaasullu nunarsuarmioqataasut akuujartuinnarnerput sukkasuumik ineriartorpoq. Soorlumi aamma Nunata isittumi inissisimanera pissutigalugu Nunarsuarmioqatitsinnit soqutigineqaleraluttuinnarnera tamatta arajutsisimangikkippit.

Minnerunngitsumillu silaannap alanngoriartornera kissakkiartorneralu pissutigalugit sermersuatta sukkasorujussuarmik aakkiartornera ilisimatuussutsikut soqutigineqaleraluttuinnarluni taamatullu nunatta aatsitassaqaarnini oliaqaarninilu pissutigalugit nunanit illersornissakkut aningaasaqaarnikkullu pissaanilissuarnit soqutigineqarnera sakkortusiartuinnarluni.

Ullumikkullu nunatsinni innuttaasut, suliffeqarfiit namminersortut, pisortat ingerlatsivii assigiinngitsut, ilisimatuussutsikkut suliarpassuit, nakkutilliisoqarfiit allarpasuillu tamaasa eqqarsaatigalugit internetikkut atuinerit annertoorujussuupput minnerunngitsumik internetikkut niuerneq aamma eqqarsaatigalugu. Taamattumik internetikkut nunatsinni ingerlatsinitta isumaannaatuunissaa pingaartorujussuuvoq.

Internetikkut pinerlulutik inunnik alapernaassuisartut aammalu Inaternetikkut attaveqaatit atorlugit inoqatiminnik pinerliinniartartut soorunami inatsisitigut tunngaveqartunik nakkutigineqarnissaat pisariqarluinnarpoq. Aammalu internetikkut paasissutissanik unioqqutitsisumik tigooqqaasernerit akiornissaannut inatsisitigut tunngaveqartumik suliarineqartarnissaat pingaaruteqarluinnarpoq.

Taamannak oqaaseqarluta siunnersuutip aappassaaneerineqannginnermini Inatsiseqarnermut ataatsimiititaliamit suliarineqarnissaa innersuussutigaarput.

Pele Broberg, Partii Naleraq